

RIGLYNE VIR DIE KEURING VAN STUDENTE VIR DIE BED ALGEMENE ONDERWYS- EN OPLEIDINGSPROGRAM

1. DOEL EN RASIONAAL

1.1 DOEL VAN DIE FAKULTEIT OPVOEDKUNDE SE INSKRYWINGSBESTUUR- EN KEURINGSTELSEL

- 1.1.1 Om die inname van nuweling eerstejaarstudente te beperk ten einde die 2018-Raadsteiken vir die US te kan bereik;
- 1.1.2 Om die groei van die studentegetalle tot die vlakke te beperk soos aan die Departement van Hoër Onderwys en Opleiding vir subsidie voorgelê, en
- 1.1.3 Om die diversiteit van die studente binne die betrokke program volgens gestelde teikens te behaal.

2 PROGRAM: BED ALGEMENE ONDERWYS- EN OPLEIDINGSPROGRAM

2.1 TYDPERK VAN PROGRAM

Hierdie voorgraadse program strek oor vier akademiese jare.

2.2 DOELSTELLING VAN BED-PROGRAM

Die hoofdoel van die vierjarige BEd-program is die aanvanklike opleiding van onderwysers vir die Algemene Onderwys- en Opleidingsfase. Die keusemoontlikhede van die program maak spesialisering ten opsigte van óf die Grondslagfase óf die Intermediêre en die Senior Fases vanaf die tweede jaar moontlik.

2.3 TOELATINGSVEREISTES

- 2.3.1 Toelating tot die BEd Algemene Onderwys- en Opleidingsprogram is aan keuring onderworpe en slegs 'n beperkte getal plekke is volgens die Amptelike Inskrywingsteikens (AIT's) beskikbaar. Akademiese oorwegings geld in die keuringsproses en voldoening aan die minimum toelatingsvereistes waarborg nie keuring nie.
- 2.3.2 Die minimum toelatingsvereistes waaraan gekeurde kandidate by registrasie as student vir die program moet voldoen, is die volgende:
 - 2.3.2.1 Die Nasionale Senior Sertifikaat (NSS) of *Independent Examinations Board* (IEB)-sertifikaat, soos gesertifiseer deur Umalusi, met 'n punt van minstens 4 (50%) in vier aangewese universiteitstoelatingsvakke. Daar moet op die sertifikaat gesertifiseer word dat die kandidaat toelating tot Baccalaureusgraadstudie verwerf het.
 - 2.3.2.2 'n Gemiddelde persentasie van minstens 55% behaal vir die NSS of IEB (Lewensoriëntering uitgesluit).

2.3.3 Die volgende spesifieke vereistes geld ten opsigte van taalvakke en wiskunde:

2.3.3.1 **Afrikaans:** *Indien u onderrigtaal in Graad 12 Afrikaans was, moet soos volg in TWEE van die onderstaande taalvakke presteer het:*

- Vlak 5 (60%) vir Afrikaans (Huistaal of Eerste Addisionele Taal) en
- Vlak 4 (50%) vir Engels (Huistaal of Eerste Addisionele Taal) of
- Vlak 4 (50%) vir Xhosa (Huistaal of Eerste Addisionele Taal).

2.3.3.2 **Engels:** *Indien u onderrigtaal in Graad 12 Engels was, moet u soos volg in TWEE van die onderstaande taalvakke presteer het:*

- Vlak 5 (60%) vir Engels (Huistaal of Eerste Addisionele Taal) en
- Vlak 4 (50%) vir Afrikaans (Huistaal of Eerste Addisionele Taal) of
- Vlak 4 (50%) vir Xhosa (Huistaal of Eerste Addisionele Taal).

Die Fakulteit volg 'n taalbeleid wat beoog om meertaligheid binne die Wes-Kaap konteks te bevorder waar Afrikaans, Engels en Xhosa die mees dominante tale is. Vir professionele onderwysersopleiding is dit noodsaaklik dat studente spesifiek ook vir hierdie geografiese konteks voorberei word. Om hierdie rede is daar drie taalbane binne die program geskep wat studente kan aanbied, te wete Afrikaans, Engels en Xhosa. In die programstruktuur word daar dus vir hierdie drie taalbane voorsiening gemaak.

2.3.3.3 **Wiskunde:** Vlak 3 (40%) vir Wiskunde **of** Vlak 5 (60%) vir Wiskundige Geletterdheid

[LW: Studente wat vóór 2008 die skooleindeksamen afgelê het, moet minstens Wiskunde Standaardgraad (SG) op Graad 12-vlak geslaag het.]

3 AANSOEK- EN KEURINGSPROSES

3.1 AANSOEKPROSES

- 3.1.1 Potensiële kandidate moet voor 30 Junie van die voorafgaande jaar aansoek doen om toelating tot die BEd-program.
- 3.1.2 Die eerste keuring vind daarna plaas.
- 3.1.3 Kandidate wie se persentasiegemiddeld 70% en hoër is, se aansoeke kan vroeër gekeur word. Hierdie kandidate word so spoedig moontlik na die ontvangs van hulle aansoeke skriftelik in kennis gestel dat hulle gekeur en voorlopig toegelaat is.
- 3.1.4 Na afloop van die keuringsvergadering word aplikante skriftelik voor die einde van Augustus van die keuringsuitslag in kennis gestel en versoek om binne drie (3) weke skriftelik teen 'n gestelde keurdatum te reageer of hulle die aanbod aanvaar al dan nie.
- 3.1.5 Tydens die tweede keuringsronde kan tweedekeuse-aansoekers wat nie vir die program van hul eerste keuse suksesvol was nie, ook oorweeg word (indien daar nog plek beskikbaar is).
- 3.1.6 Die plekke van aansoekers wat nie teen die keurdatum op die aanbod reageer nie, word gekanselleer.

3.2 ALGEMEEN

- 3.2.1 Die BEd-Algemene Onderwys- en Opleidingsprogram is 'n keuringsprogram en in die lig van die Amptelike Inskrywingsteikens (AIT's), is 'n beperkte aantal plekke vir die program beskikbaar.
- 3.2.2 Slegs akademiese oorwegings geld in die keuringsproses. Nie-akademiese oorwegings soos leierskap, gemeenskapsdiens, sportprestasies en aanduidings van besondere belangstelling in die onderwys, word nie in aanmerking geneem nie.
- 3.2.3 Aangesien nie alle gekeurde kandidate die keuringsaanbod aanvaar nie, word daar meer kandidate gekeur om te kompenseer ten einde die AIT van 250 te bereik. 'n Oorboekkoers word jaarliks bepaal, onder meer met verwysing na registrasietendense sedert die instelling van die NSS in 2009.
- 3.2.4 Slegs aansoekers wat BEd as hul eerste keuse aangedui het, sal met die eerste keuringsronde oorweeg word. Aansoekers wat BEd as hul tweede keuse aangedui het, kan tydens die tweede keuringsronde in aanmerking geneem word.
- 3.2.5 Voldoening aan die minimum toelatingsvereistes waarborg nie suksesvolle keuring nie.

3.3 GETAL PLEKKE

- 3.3.1 Daar is 'n maksimum van 250 plekke vir eerstejaars beskikbaar. Dit is die Amptelike Inskrywingsteikens (AIT) van die US Raad vir die Fakulteit.
- 3.3.2 Die eerste 165 plekke word volgens akademiese meriete toegeken deur die aansoekers in meriete-orde van 1 tot 165 te rangskik, ongeag bevolkingsgroep, herkoms of ander oorwegings.
- 3.3.3 Benewens die plekke aan bruin, swart en Indiër-studente toegeken wanneer die aanvanklike lys opgestel word, word daar sestig (65) van die 250 plekke vir bruin-, swart- en Indiër-studente geormerk ten einde 'n diversiteitsteiken van 'n minimum van 26% vir eerstejaars vir die fakulteit te behaal.
- 3.3.4 Twintig (20) van hierdie 250 plekke word vir diskresionêre gevalle geormerk. Hierdie plekke kan op grond van buitengewone oorwegings deur die dekaan (of sy/haar gevolmagtigde) toegeken word.

3.4 TOEKENNING VAN PLEKKE

3.4.1 Kandidate wat nog nie oor NSS beskik nie (huidige skoliere)

- 3.4.1.1 Die eerste 165 plekke sal toegeken word volgens akademiese meriete deur dit in meriete-orde van 1 tot 165 te prioriseer en wel op die volgende wyse: 1 is die hoogste gemiddelde van die Graad 11-persentasie (Lewensoriëntering uitgesluit), die 2^{de} plek is die tweede hoogste persentasie, ensovoorts tot by 165, ongeag bevolkingsgroep, herkoms of ander oorwegings. 'n Addisionele vyf en sestig (65) plekke word vir BSI-studente geormerk.
- 3.4.1.2 Indien daar nie genoeg aansoekers uit die BSI-kandidate is om die vermelde 65 plekke (vergelyk 3.3.3) te vul nie, word die oorblywende plekke uit die res van die aanvanklike lys gevul.

3.4.1.3 Vir keuring om toelating tot die vierjarige program vir die BEd-graad in Algemene Onderwys en Opleiding, moet daar aan die toelatingsvereistes soos in paragraaf 2.3 uiteengesit, voldoen word:

3.4.2 Kandidate wat reeds in besit is van 'n NSS (afgestudeerde skoliere)

3.4.2.1 Aansoekers wat reeds in besit is van 'n skoleindsertifikaat, vorm deel van die 165 plekke. Keuring vind plaas op grond van die gemiddelde persentasie van hul NSS- of IEB-uitslae (Lewensoriëntering uitgesluit) of ander skoleindsertifikaat.

3.4.2.2 Sien ook 2.3 in verband met voldoening aan die algemene toelatingsvereistes van die US, sowel as aan die BEd-program se spesifieke toelatingsvereistes.

3.4.3 Huidige studente

3.4.3.1 Slegs 'n beperkte aantal plekke word vir huidige studente geormerk. Hierdie plekke vorm deel van die 20 plekke wat vir die diskresionêre gevalle geormerk word.

3.4.3.2 Hierdie plekke word geormerk vir studente van hierdie universiteit, asook studente van ander universiteite.

3.4.3.3 Hierdie groep word hoofsaaklik gekeur op grond van akademiese oorwegings waar beide die finale NSS-uitslae en die prestasie in die universiteitsprogram waarvoor hulle tans ingeskryf is, oorweeg word.

3.4.3.4 Aansoekers in hierdie kategorie moet steeds aan die BEd-program se spesifieke toelatingsvereistes voldoen.

3.4.3.5 Akademiese oorwegings

- * Studente moet normaalweg 'n gemiddeld persentasie van minstens 55% in hul finale NSS-eksamen behaal het, en

- * Studente moet minstens 50% van die krediete van die huidige jaargang van die betrokke program waarvoor hulle tans ingeskryf is, geslaag het.

3.4.3.6 Keuring vir hierdie groep vind in Desember van die voorafgaande jaar in 'n derde keuringsronde plaas nadat die finale eksamen-uitslae bekend is

3.5 ANDER AANSOEKERS (INTERNASIONAAL EN KANDIDATE WAT NIE DIE NSS OF IEB AFGELÊ HET NIE)

3.5.1 Aansoekers wat nie die NSS of IEB eksamens afgelê het nie (byvoorbeeld die Cambridge-eksamens, Tuisskool, *School of Tomorrow* en so meer, asook die vorige Suid-Afrikaanse Senior Sertifikaat wat tot in 2007 bestaan het) of internasionale aansoekers, word soos volg in die keuringsproses hanteer:

3.5.1.1 Aansoekers in besit van 'n Suid-Afrikaanse Senior Sertifikaat wat in 2007 of vroeër behaal is, se gemiddelde persentasie in hulle skoleindeksamen word gebruik wanneer die keuringslys opgestel word met die oog op die vulling van die eerste 165 plekke.

3.5.1.2 Ander aansoekers se skoolleindsertifikaat word vir validering na die US se Nagraadse en Internasionale Kantoor verwys en 'n omrekeningstabel (opgestel en bygehou deur die Registrateurskantoor in samewerking met die Nagraadse en Internasionale Kantoor) word gebruik om 'n vergelykbare gemiddelde skoolleindpersentasie aan hulle toe te ken wat gebruik word wanneer die keuringslys opgestel word met die oog op die vulling van die eerste 165 plekke.

4. KEURKOMITEE

4.1 Die keurkomitee word soos volg saamgestel:

4.1.1 Die Sameroeper van die BEd-programkomitee as Voorsitter van die keurkomitee.

4.1.2 Minstens vier lede van die BEd-programkomitee, die Programsameroeper uitgesluit.

4.1.3 Die Visedekaan (Onderrig) as verteenwoordiger van die Dekaan van die Fakulteit Opvoedkunde of sy/ haar gevolmagtigde.

4.1.4 Die Fakulteitsekretaris (of gevolmagtigde) as verteenwoordiger van die Registrateur.

4.2 Die Keurkomitee kan enige persoon wat 'n toepaslike inset kan lewer, op die Keurkomitee koöpteer.

Prof Y Waghid
Waarnemende Dekaan: Fakulteit Opvoedkunde

Prof R Carolissen
Visedekaan (Onderrig en Leer)

10 April 2017